

**Miguel Anxo FERNÁN VELLO**

**Confesión**

Vivo na respiración do poema  
e non teño outro oficio  
nin outra patria.  
Aquí consumo todas as chamas,  
porque me alimento  
da máis profunda luz  
e ás veces a miña carne é un incendio  
que me devora.  
Vivo no alento permanente  
do mundo  
e sei sentir a chuvia  
como un palpito  
que fai transparente a existencia.  
Teño a voz na ferida do ser  
e canto desde a raíz do silencio  
para voltar á vida.  
Nos meus ollos renace  
a natureza que amo  
e brilla no meu pensamento  
a súa nudez secreta.  
Eu sei beber do meu propio desexo  
para que arda o mel escuro dos corpos,  
a mordedura viva  
que descobre o pracer  
na fibra azul do sangue,  
no xemido que inaugura o sabor  
da morte.  
Vivo nesa harmonía extrema  
das voces que me atan  
a unha antiga esperanza,  
o verso que se eleva no tempo,  
no seu gume perfecto  
esculpido na noite  
como unha queimadura,  
astro que estremece  
o destino.  
Vivo na materia da pureza  
e da desolación,  
posuído polas violáceas luces  
do asombro,  
na piedade desta música  
que treme  
no futuro.